

Intelectualmente cualifica

Pronto lo saca aviso cu rekisito pa defensor di pueblo

ORANJESTAD - Presidente di Parlamento tin informacion di con e defensor di pueblo na Hulanda y Corsou ta funcion, informacion aki ta locual ta wordo uza como ehempel durante instalacion di esun na Aruba, teniendo cu situacion na cada pais ta diferente.

A puntra presidente di parlamento Marisol Lopez - Tromp, si e ley pa duna e sosten na e defensor di pueblo mester bay wordo traha a base di Aruba su sistema, o manera e ta na Hulanda.

"Hulanda tin su defensor di pueblo y defensor di mucha pa basta tempo caba. Ami como presidente di parlamento por a reuni cu nan na diferente ocasion pa haya idea di con el a funciona den prac-

tica. Tambe tabatin reunion como comision cu e defensor di pueblo na Corsou Sra. Alba Martijn, unda a haya bista di con esaki ta funciona na Corsou. Cu e meta pa haya un idea/bista den practica con e ley por wordo traduci na Aruba. Cada pais tin su reto y problemanan y den relacion anual di e pais (Corsou) ta mira cu e kehonan ta varia tur luna," Sra. Lopez - Tromp a splica.

Aviso rekisito

Actualmente ta den preparacion pa saca un aviso den prensa unda cu ta pone e rekisitonan cu e defensor di pueblo lo mester tin (esun cu ta bay dirigi e departamento). Esey lo wordo publica y esun cu ta cualifica lo por reaccionar cu e meta pa parlamento por nombra e defensor di pueblo y defensor di mucha,

Sra. Lopez - Tromp a bisa. A puntra presidente di parlamento ken por bira un defensor di pueblo na Aruba, kico mester ta su specialisacion. El a bisa: "E persona mester tin diferente experticio, por duna ehempel cu na Hulanda e defensor di mucha mester tin experticio den ramo social e por ta pedagogico, hurista, enseñansa, financiero entre otro. E experticio por varia a base di e tipo di demanda cu e ciudadano tin." E ta bay ta un departamento ekipa pa profesional, el a agrega.

Tarea

Importante segun Sra. Lopez - Tromp ta cu e futuro defensor di pueblo y defensor di mucha lo no ta un persona cu ta bay sinta scucha so, e ta bay haya cierto poder y tarea cu e por haci pa actua ora cos no ta bay manera cu



mester bay. Su rol ta hasta encera cu e mester cuestion cierto departamento. "Den practica por sosode cu ta haya keho di un departamento, y pa trata di yuda e ciudadano mas miho posibel, e defensor por haya su mes ta investiga si e keho ta realmente asina. E ta depende e tipo di keho." Finalizando e presidente a

bisa cu mirando e trabou di e defensor, e kier conscientisa e aparato gubernamental riba e cambionan cu lo bin unabes e ley bin na vigor. Y e ta un ley basta amplio y importante pa Aruba mirando cu ta casi 20 aña caba cu na parlamento tabatin hasta iniciativa cu a wordo entrega pero nunca a wak luz di dia. □